



阿茲海默症

過晝，外勞又搵等八十歲个伯婆過家寮欸。阿伯婆自家還曉得行、尋人寮，毋過驚怕佢跌倒、出去尋毋著屋轉，還係愛人掌等正做得。醫生講佢著（cog）著（do`）阿茲海默症，又安到腦退化症，一般人講老人痴呆症——盡早係德國精神科醫生、神經病理專家愛羅斯·阿茲海默在 1906 年起勢描寫記錄个，後來就用厥名仔來安這種症頭。

「媽！仰摻菜腳仔擺到湯裡肚呢？」「係啊！愛較省做兜仔！莫打爽！毋好恁折福！」阿伯婆還應異遽。總係，輒輒毋記得東西放哪位，尋毋著自家个東西，又還會疑狐人同厥東西偷罔起來。下擺仔，毋記得自家正食飽晝，又怪怨心曰：「有閒寮當晝，無閒煮飯分人食，異不孝。」毋知佢係挑事還係老欸、呆確了——一擺、兩擺做事、收摯東擺西合掙到不搭不膝，講佢又詐聽，反應還算遽，毋過應到分人鬥毋著，掙到屋下人強強會癲忒，厥手腳也毋靈動了。該下，就像這症頭个早期了。

幾隻月前，阿伯婆看著厥孫郎像看外人樣仔緊相、當歡喜个講：「阿富哥這隻俵仔還斯文哦！」（失認症）。有成時，想毋著佢愛講个話（命名不能症），輒輒拿鬥毋著个話來鬥（言語錯亂症），毋過，還異肯講。這下，厥話緊來緊少欸。暗晡頭跣起來遊遊野野、抹抹摸摸，屙屎屙到一便所，下擺仔還地來膏壁，較難挨（ngai）。既經係中度阿茲海默症了，智力退化到七歲以下欸。

到重度該下，話語能力可能退化到伸著幾隻仔字，行動能力也會退化到像嬰兒仔樣仔，專專愛依靠別人來服侍，平均時間就伸無三年了。

灶下、茶園、菜園，該聲脰亮亮、活跳个身裝仔還在吾目珠前振振轉，屋面前外勞又搵等八十歲个佢行過。後生个、老欸个佢，一瞞目過。

作者：彭瑞珠

☆詞彙學習☆

【起勢】hi` sii：開始。

【挑事】tiau` sii：故意、刻意。

【菜腳仔】coi giog` e`：剩菜。

【呆確】ngoi` doi：痴呆。

【疑狐】ngi` fu`：懷疑。

【相】xiong：仔細看、打量。

【怪怨】guai ien：抱怨。

【專專】zon` zon`：專一。

☆文法學習☆

【AABB 動詞】：雙音節動詞重疊式，表示動作的持續不斷或反反覆覆，有時用以描述非專注、沒有特定目的的行為。

例：遊遊野野（四處閒逛）、抹抹摸摸（東摸西摸）

你趁趁掌掌，愛趁到哪去？（你晃啊晃的，要晃去哪兒？）